

Pemimpin sifatkan tambahan kuota membalas budi rakyat 23

UM 11.12.99

KOTA KINABALU 10 Dis.— Para pemimpin Barisan Nasional (BN) Sabah menganggap keputusan Datuk Seri Dr. Mahathir Mohamad menambah kuota menteri bagi negeri ini adalah sebagai membalas budi rakyat Sabah yang memberi sokongan padu kepada BN pada pilihan raya umum lalu.

Pada pilihan raya umum lalu, BN Sabah memperoleh 17 daripada kerusi Parlimen yang dipertandingkan terutama melalui UMNO.

Pengumuman pembentukan barisan baru Kabinet Pusat oleh Perdana Menteri di Putrajaya hari ini, menyaksikan Sabah kini diwakili oleh tiga menteri penuh, dua timbalan menteri serta dua orang setiausaha Parlimen.

Menteri Tanah dan Pembangunan Koperasi, Tan Sri Kasitah Gaddam serta Datuk Pandikar Amin Mulia masing-masing kekal

memegang portfolio sebagai Menteri Tanah dan Pembangunan Koperasi dan Menteri di Jabatan Perdana Menteri.

Ahli Parlimen Kota Kinabalu, Tan Sri Bernard Dompok pula kembali sebagai Menteri di Jabatan Perdana Menteri yang pernah disandanginya pada tahun 1995.

Bekas Timbalan Menteri Perumahan dan Kerajaan Tempatan, Datuk Shafie Apdal yang juga Ahli Parlimen Semporna kini bertukar ke Kementerian Pertahanan sebagai Timbalan Menteri, manakala Ahli Parlimen Beaufort, Datuk Anifah Aman dilantik sebagai Timbalan Menteri Perusahaan Utama.

Sementara itu Ahli Parlimen Tenom, Rizalman Abdullah dilantik sebagai Setiausaha Parlimen Kementerian Pembangunan Usahawan.

Bernard ketika diminta

mengulas kabinet baru Dr. Mahathir itu menyifatkan pelantikannya sebagai Menteri Di Jabatan Perdana Menteri sebagai satu tanggungjawab berat yang harus dipikul dalam merealisasikan wawasan kepimpinan negara pada alaf akan datang.

“Saya akan bekerja kuat bagi membalas kepercayaan rakyat yang memberi sokongan kepada Barisan Nasional (BN) untuk kembali membentuk kerajaan,” katanya yang juga Presiden Pertubuhan Pasok Momogun Kadazandusun Bersatu (UPKO).

Mengenai pertambahan kuota menteri dalam barisan kabinet Pusat kali ini, Dompok berkata, ia membuktikan kerajaan BN menghargai sokongan rakyat di negeri ini dalam memastikan kemenangan besar parti itu pada pilihan raya umum lalu.

Ahli Parlimen Beaufort,

Datuk Anifah Aman pula menyifatkan pelantikannya sebagai Timbalan Menteri Perusahaan Awam sebagai pengiktirafan dan kepercayaan pucuk pimpinan kepada rakyat Sabah.

Sambil mengucapkan terima kasih kepada Perdana Menteri, Datuk Seri Dr. Mahathir Mohamad, Anifah berkata, beliau tidak menduga dipilih dalam barisan kabinet Pusat tetapi berjanji akan terus memberikan khidmat sebaik mungkin bagi memenuhi tanggungjawab itu.

Sementara itu, bekas Ketua Menteri yang juga Ahli Parlimen Kota Belud, Datuk Salleh Tun Said berkata, rakyat Sabah ternyata gembira dengan pelantikan beberapa pemimpin dari negeri ini yang menganggotai kabinet Pusat.